



Tom Bennet: femine pleade

jentrade

nancje plui timp par svuarbâ un
sium, o la fate di scuarzi un moment al dolôr. di jevât, propit li che ogni dì
il soreli al imboree la sperance, vuê slusoradis e spandin scatûr. intant che
un sunsûr di tons e di sclops, al promet di vicin incursions di fâ pôre. la
spiete e je piês dal mâl provinât.

ce fasino? ... scjampin !

indulà vino di lâ, nô no podin, diu-nus-vuardi ...

... e rivin, Signôr ... veju chi !

e ogni dì, par un an, e fischin a
fuarce. e usurpin: lis bestiis par fan, lis frutis di tîr. ancje chês fatis, se
non cjatin di miôr. la lôr pofardie no sarà di sostanze: cjatât il contrast a
scjampin di corse là che jerin vignûts. ma lassant intal mieç, dolôr pai abûs e
smare spiçade pes profanazions.

acont di un crudêl mai viodût, dentri il secul plui curt [\[\[1\]\]](#).

nô cumò, no fasin plui orele, cun
tantis che o sintin ogni dì tor pal mont. ma cheste e je nestre: passade inte
cjar di une vore di feminis. une storie petade tant timp indaûr. metude in
tasê. scuindude in vergogne: di chês che ai fruts non si puedin contâ.

propit par chest la clamìn dongje, culì.

prin cuadri

vincjesiet di Otubar dal '17, intal

secul passât: le disfate di Cjaurêt. intun sclop une brentane di int e scjampe daûr dal soreli: vie pai puints di Curnin e Pinçan, di Codroip e Tisane. cun lôr ancje tancj sbandâts, cence ordins, cence nancje plui armis: un pôcs e laran a cuistâsi une bale tal pet, su comant di Cadorna. pensâ che le cause e jere stade la sô, toc di picjât !

e chei dai imperis centrâi si

sdrumin jù pal Friûl: todescs, di ogni Stât, austriacs e ongjarês, cecs e slavuacs, slovens e cravuats, bosgnacs, montenegrins, ucrainians, bulgars, polacs de Galizie, serps de Vojvodine, talians dal Trentin, dal cjadin di Tarvis, di Gurize e Triest, rumens de Transilvanie, dal Banat, de Bucovine.

il comant non ur proviôt le

razion: *e vês di rangjâsi sul puest*. lôr

e van a robâ: pazience, a vevin fan. ma e an ancje sêt: e botinin, si incjochin. no ur baste ancjemò: e an di meti al sac, e an di rompi, cun brutalitât e dispreg.

e scjavacin frutis: in tancj.

fantatis: plui voltis. maridadis: in schirie. latoanis: ridint. maris: denant dai lôr fîs. cence cussience, no cjatin intops: e an denant nome vecjos (i zovins e son ducj a combati pe patrie). ma ce puedino i vecjos par tentâ di fermâju! ur vosin denant, po ju prein daûr cun lagrimis fredis, di frut. lôr ju pachin, ju pein. e ur doprin le brût cule gnece. le mari de brût e le fie de gnece.

tantis e an tentât di scjampâ:

fermadis cul sclop. altris e an smenât par dibant: e dopo si son copadis bessolis. tantis a son stadis maceladis daspò l'abûs. e altris, butadis di bande, e an dât di volte. o si son lassadis murî.

cussì in tancj pais: Cividât,

Cjassà, Dartigne, Cjampei, Codroip, Darte, Zenodis, Torean, Udin, Prissinins,
Forgjarie, Ronchis, Faedis, Davâr, Tarcint, Ravose, Paulêt, Savorgnan, Trep,
Segnà, Ospedâl, Tresesin, Sant Denêl ...

fin dal prin toc. continue ...

dal Passadôr

[1]

espression doprade da Eric John Ernest
Hobsbawm, come titul dal so libri: *il
Secolo breve, 1914-1991.*